

№ 137

Я РУСИН +


УПОРЯДКОВАВ
СЕВЕРИН БОЧЕК,
ШКОЛЬНЫЙ ИНСПЕКТОР.

МАЛЮНКИ МАЛЮВАВ В. МАШЕК.


EX
LIB
RIS



PAUL R. MAGOCSI



No 187



Я РУСИН

УПОРЯДКОВАВ
СЕВЕРИН БОЧЕК,
ШКОЛЬНЫЙ ИНСПЕКТОР.

МАЛЮНКИ МАЛЮВАВ
В. МАШЕК.

Бендасю

Цѣна книжки в переплетѣ

Кѣ 6—.

ДЕРЖАВНЕ ВИДАВНИЦТВО В ПРАЗЬ.

Всѣ права застережени.




Печатня Державного Издавництва в Празѣ.



Я Русын быв.

Я Русин быв, єсм и буду,
Я родився Русином,
Честный мѡй рѡд не забуду,
Останусь єго сыном.





Зозуленька.

Ой кувала зозуленька,
Кувала, кувала,
Як учула: зима буде,
Она ся сховала.



Дзвоны

ДЗВОНЯТЬ...

Ой дзвоны дзвоняць,
Хорты вовка гоняць.
Мочарямі, болотамі,
Дзе людзе не ходзяць.

Зайчик.

Там у лѣсѣ малѣ дѣти
Избирають краснѣ цвѣты.
И забаву изробили
И зайчика сполошили.
Гулю! зайчик утѣкає
И лапками пѣдкидає.
Якбы и мы лапки мали,
Мы бы також утѣкали.



Летѣла ворона.

Летѣла ворона
По зеленѣм гаю,
А за нею вороны
При быстрѣм ручаю.
Гей же, мало нас—мало нас,
И ты, дѣвча, йди до нас!



Старый медвѣдь.

Старый медвѣдь мѣцно спить,
Як ся збудить, так нас з'ѣсть —
Мы го не збудимо,
Бо го ся боимо.



Нôч.

Тихая ноченька,
нôч чарôвниченька.
Землю вкрыває.

Князь наш яснаськый, мѣсяць повнесенькый
Лагôдно сяє.
Онъ усмѣхаються, в хмары ховаються
Звѣзды золотистѣ,
В тѣняхъ схованѣ, сплять зачарованѣ
Квѣты барвистѣ.

Полонинко.

Полонинко, полонинко,
Чомусь неоднака?
В однѣмъ концѣ пасуть овцѣ
А в другѣмъ ягнята!
А я поїду в полонинку
У велику гущу,
Та там я ся зарубаю,
Нѣкого не пущу.
А я поїду в Мараморош
Та там ся оженю,
Таку за собѣ ся жону возьму,
Що стане в кешеню.



На поли.

Роси, роси, дощику, ярину,
Рости, рости, житечко, на лану!
На крылочках, вѣтрику, полети,
Колосочки золотом обмети!
Як достигне житочко на лану,
Прийдуть люде жатоньки ярину.
Блискавками косоньки заблищать
И серпами срібними забрящать.

Кумина лучка.

Ой, на горѣ дубина,
Чія лучка—кумина.
Ити бы ми просити,
Ци дала бы косити.
Коси, куме, кôлько хоч,
Лем ми траву не столоч!
Моя трава шовкова,
А я дѣвка попова.
А я дѣвка попова,
Тай до танцю готова.
Бо до танцю скачучи,
До роботы плачучи.

Качурик.

Ой ходила дѣвчинонька бережком,
Заганяла качурика батôжком.
Иди, иди, качурику, до дому,
Продам тебе жидовинѣ рудому.
За три копы качурика продала
А за копу циганика наяла.
Заграй менѣ, циганику, на дуду,
Най я своє горенько вже забуду.

Курочка и курята.



Попо двору квокаючи
Чорна квочка ходить,
Стадо курят молоденьких
За собою водить.

Ходить сюда и пильненько
Добычѣ глядає
А як найде, то до неѣ
Курята скликає.

Роздробляє зерно, жуки,
Дѣточки годує,
Хоть сама и є голодна
И не раз бѣдує.

А як ястряб, ци ворона
Надлетить горою,
Квочка дѣти прикликає,
Крыє их собою.

Так и мати наша родна,
Лиш про нас все дбає,
Од хвороты и нещастя
Нас охороняє.



Ворона.

Ворона кашу варила,
На порозѣ студила.
Дѣти свои скликала
И им таке сказала:

„Сходѣться, дѣти, до купы,
Бо то вже каша, не крупы,
Бо то вже каша смачненька,
Спѣшѣться, кличе вас ненька.“

Родина.

Нянько, мати, братя, сестры —

Се моя родина.

Коли всѣ здоровѣ в хатѣ —

То добра година.

Мати наша стараєся,

Щоб нас приодѣти,

За то мы всѣ учимося,

Щобы щось умѣти.

Нянько каже: „Не дармуйте,

Берѣть книжку в руки,

Бо теперь на свѣтѣ тяжко

Жити без науки!“



Мама и дѣти.

Кто вас, дѣти, сильно любить,
Кто вас, дѣти, все голубить,
Кто старается о вас
Безпрестанно, в каждый час?

Мама ваша дорога,
Добра, мила, золота!

Кто в колысцѣ вас всыпляет,
Кто пѣсней забавляет,
Кто вам каже казочки,
Кто дает вам забавки?

Мама ваша дорога,
Добра, мила, золота!

Кто, коли вы пустотливѣ,
Непослушнѣ и лѣнивѣ,
Ходить в смутку и журбѣ
З тяжким жалем на душѣ?

Мама ваша дорога,
Добра, мила, золота!



Санки.

Ой снѣг, дѣти, снѣг,
Вже не видно дорѣг,
Вже присыпана хата,
Повна снѣгу загата.
Вже присыпана хата
Повна снѣгу загата.

Ану, хлопцѣ, на бѣк!
Бо я иду на потѣк,
Та ще тягну санчата,
Утѣкайте, дѣвчата!
Та ще тягну санчата,
Утѣкайте дѣвчата!

Як зайду на гору,
Як санчата попру,
Та як пушусь стрѣлою,
Тѣлько копѣть за мною.
Та як пушусь стрѣлою,
Тѣлько копѣть за мною.



СНѢГОВЫЙ ДѢД.

Ану, кто з вас там быстрѣйшій?
То идѣть в садок скорѣйше!
Купы снѣгу там лежать
Дѣда треба нам скачать.

Хлопцѣ поклик пѣдхопили,
Дѣда з снѣгу враз злѣпили.
Очи з угля му всадили,
Рот из буряка зробили.

От так, дѣдо! Молодцѣ!
Ну, дивуйтесь, воробцѣ!

Свадьба мороза.

От сороки-бѣлобокѣ короля вбирають,
А вороны-мѣщаночки пѣснѣ все спѣвають.
Вѣтер свище у дубочку, а ворона краче,
Молодая, веселая: смѣся, не плаче.

Сидить хрумтитъ сосулочка из леду орѣшки,
Снѣгурчики, чечѣточки прискакали пѣшки.
Воробчички-молодички з ними танцювали,
А зайчики и лисички гостей честовали,
Тай пампушки як подушки зо снѣгу всѣ ѣли.
Сѣрѣ вовки за столами гей сваты сидѣли,
Та очима свѣтячими на зайчат дивились.
А зайчата, гей дѣвчата, з хлопцями кружи-
лись.

Як узявся мороз в боку та став танцювати,
То мусѣли усѣ гостѣ з будинку втѣкати.
Свище, рипить пѣдскакує онѣ дубы трѣщали.
Оттак колись морозову свадьбу исправляли.





Карпатскій край.

Господи! Благословляй
Наш карпатскій милый край,
Его горы, рѣнины,
И всѣх газдѣв родины.
Боже дай, щобъ якъ рай,
Щасливъ бывъ карпатскій край!




Содержане.

	Сторона
Я Русин был	3
Зозуленька	4
Дзвоны дзвонять	5
Зайчик	6
Летѣла ворона	6
Старый медвѣдь	7
Нôч	8
Полонинко	9
На поли	9
Кумина лучка	10
Качурик	10
Курочка и курята	11
Ворона	12
Родина	13
Мама и дѣти	14
Санки	15
Снѣговый дѣд	16
Свадьба мороза	17
Карпатскій край	18



18. 12. 4



ПЕЧАТАНО В ДРУКАРНИ ДЕРЖАВНОГО
ВЫДАВНИЦТВА В ПРАЗЬ.